

უკანონო მიყურადებისა და ფარული ჩანაწერების საკითხებზე მომუშავე დროებითი
კომისიის

ს ხ დ ო მ ი ს ო კ მ ი N1

ქ. თბილისი, 2014 წლის 31 იანვარი

კომისიის სხდომის ჩატარების საფუძველია საქართველოს მთავრობის 2013 წლის 15 აგვისტოს N206 დადგენილება „უკანონო მიყურადებისა და ფარული ჩანაწერების საკითხებზე მომუშავე დროებითი კომისიის შექმნისა და მისი დებულების დამტკიცების თაობაზე“. კომისიის სხდომის მოწვევის საფუძველია კომისიის თავმჯდომარის 2014 წლის 29 იანვრის N3 გადაწყვეტილება.

სხდომას ესწრებოდნენ:

1. ალექსანდრე ჭიკაძე – კომისიის თავმჯდომარე, საქართველოს შინაგან საქმეთა მინისტრი;
2. თეა წულუკიანი – საქართველოს იუსტიციის მინისტრი;
3. მერაბ გაბინაშვილი – თბილისის სააპელაციო სასამართლოს მოსამართლე;
4. უჩა ნანუაშვილი – საქართველოს სახალხო დამცველი;
5. თამარ ქალდანი – პერსონალურ მონაცემთა დაცვის ინსპექტორი;
6. ლაშა ტულუში – გაზეთ „რეზონანსის“ მთავარი რედაქტორი;
7. კახა კახიშვილი – საარჩევნო და პოლიტიკური ტექნოლოგიების კვლევის ცენტრის ხელმძღვანელი;
8. ევა გიგაური – ა(ა)იპ - „საერთაშორისო გამჭვირვალობა – საქართველოს“ აღმასრულებელი დირექტორი;
9. ლევან იზორია - კომისიის მდივანი, საქართველოს შინაგან საქმეთა მინისტრის მოადგილე.

სხდომის მსვლელობა:

1. კომისიის თავმჯდომარემ გახსნა სხდომა და კომისიის წევრებს გააცნო სხდომის დღის წესრიგი.

2. კომისიამ მოისმინა სამუშაო ჯგუფის მიერ გაწეული საქმიანობის ანგარიში.

3. კომისიამ განიხილა და დაამტკიცა კომისიის საქმიანობის საბოლოო ანგარიში.

4. კომისიის საქმიანობის ანგარიშთან დაკავშირებით შესაბამისი მოსაზრებები და წინადადებები დააფიქსირეს კომისიის წევრებმა:

ა) ლაშა ტულუშმა, ეკა გიგაურმა, თეა წულუკიანმა, თამარ ქალდანმა, უჩა ნანუაშვილმა და კახა კახიშვილმა. ისინი ერთხმად დაეთანხმნენ კომისიის ანგარიშში არსებულ საკანონმდებლო ჩარჩოს, ასევე უკანონო მიყურადების და ფარული ჩანაწერების განხორციელების კონკრეტული მეთოდების დამატებას - კომისია დაეთანხმა შემოთავაზებულ წინადადებებს;

ბ) ლაშა ტულუშმა, ეკა გიგაურმა და კახა კახიშვილმა დააფიქსირეს განსხვავებული მოსაზრებები კომისიის სამუშაო ანგარიშის დასკვნის და რეკომენდაციების ნაწილების მიმართ, რომელიც თან ერთვის აღნიშნულ ოქმს - საკითხის ზედმეტად დეტალიზაციის გამო კომისიამ მხოლოდ ნაწილობრივ გაითვალისწინა მათი შემოთავაზება;

გ) თეა წულუკიანმა მხარი დაუჭირა კომისიის წევრების ლაშა ტულუშის, ეკა გიგაურის და კახა კახიშვილის მიერ შემოთავაზებული რეკომენდაციების ნაწილს და მიზანშეწონილად მიიჩნია კომისიის საქმიანობის ანგარიშში ფარული მიყურადებისა და თვალთვალის შიდა და გარე ზედამხედველობის სისტემების რეგულაციის შემოღება.

5. კომისიამ განიხილა და მოიწონა პირადი ცხოვრების პატივისცემისა და ხელშეუხებლობის დაცვის მიზნით შემუშავებული „საქართველოს სისხლის სამართლის კოდექსში ცვლილების შეტანის შესახებ“ კანონპროექტი.

6. კომისიამ მოისმინა სამუშაო ჯგუფის ინფორმაცია პირადი ცხოვრების ამსახველი აუდიო/ვიდეო/ფოტომასალისა და დოკუმენტაციის შემცველი 635 ელექტრონული მატარებლების და სხვა მასალების შესახებ.

7. კომისიის მიერ მიღებულ იქნა გადაწყვეტილება:

ა) საქართველოს შინაგან საქმეთა სამინისტროში აღმოჩენილი აუდიო/ვიდეო/ფოტომასალისა და დოკუმენტაციის შემცველი 45 ელექტრონული მატარებლისა და სხვა მასალის განადგურების, ხოლო 590 ელექტრონული მატარებლის გამოძიების მიზნით საქართველოს მთავარი პროკურატურისთვის გადაგზავნის შესახებ;

ბ) კომისიის საქმიანობის ამსახველი მასალების და დოკუმენტაციის შენახვაზე პასუხისმგებელ დანაყოფად სსიპ - საქართველოს შინაგან საქმეთა სამინისტროს აკადემიის „შსს არქივის“ განსაზღვრის შესახებ.

8. საქართველოს მთავრობას ეთხოვა კომისიის საქმიანობის ანგარიშის მის ოფიციალურ ვებგვერდზე განთავსება.

9. ამ გადაწყვეტილების ზოგიერთი პუნქტის (მე-3, მე-4 და მე-5 პუნქტები) აღსრულება დაევალა საქართველოს შინაგან საქმეთა სამინისტროს ოპერატიულ-ტექნიკურ დეპარტამენტს.

კომისიის წევრები:

ალექსანდრე ჭიკაიძე - კომისიის თავმჯდომარე, საქართველოს შინაგან საქმეთა
მინისტრი



თეა წულუკიანი - საქართველოს იუსტიციის მინისტრი, კომისიის წევრი



მერაბ გაბინაშვილი - თბილისის სააკედაციო სასამართლოს მოსამართლე, კომისიის წევრი



ლუა ნანუაშვილი - საქართველოს სახალხო დამცველი, კომისიის წევრი



თამარ ქალდანი - პერსონალურ მონაცემთა დაცვის ინსპექტორი, კომისიის წევრი




ლაშა ტულუში - გაზეთ „რეზონანსის“ მთავარი რედაქტორი, კომისიის წევრი



კახა კახიშვილი - საარჩევნო და პოლიტიკური ტექნოლოგიების კვლევის ცენტრის ხელმძღვანელი, კომისიის წევრი



ეკა გიგაური - ა(ა)იპ საერთაშორისო გამჭვირვალობა - საქართველოს აღმასრულებელი დირექტორი, კომისიის წევრი



ლევან იზორია (კომისიის მდივანი) - საქართველოს შინაგან საქმეთა მინისტრის მოადგილე



კომისიის წევრების ლაშა ტულიშის, ეკა გიგაურის და კახი კახიშვილის განსხვავებული მოსაზრება

ვაფიქსირებთ განსხვავებულ მოსაზრებებს კომისიის სამუშაო ანგარიშის შინაარსის, დასკვნის და რეკომენდაციების ნაწილის მიმართ.

შენიშვნები ანგარიშის შინაარსთან დაკავშირებით:

მიზანშეწონილად მიგვაჩნია ანგარიშში მაქსიმალურად იყოს ჩამოთვლილი უკანონო თვალთვალისა და მიყურადების განხორციელების მეთოდები. მაგალითად, ანგარიშში, უკანონო მიყურადებისა და ფარული ჩანაწერების განხორციელებულ მეთოდებს შორის საერთოდ არ არის საუბარი იმაზე, რომ მასალების შეგროვების ერთ-ერთი მეთოდი სატელეფონო საუბრების მიყურადება და სხვადასხვა ადგილებში სათადარიგოდ დამონტაჟებული ვიდეო კამერები იყო. იქმნება შთაბეჭდილება, რომ შინაგან საქმეთა სამინისტროში დაცული ვიდეო და აუდიო მასალის მოპოვების მთავარ მეთოდს ჩანერგილი აგენტების მეშვეობით კადრების გადაღება და კომპიუტერებში სათანადო ვირუსების ჩანერგვის გზით მასალების მოპოვება წარმოადგენდა. კომისიის სხდომაზე სამუშაო ჯგუფმა წარმოადგინა ანგარიში, სადაც ფარული მიყურადებისა და თვალთვალის სხვა მეთოდებზეც იყო საუბარი. სწორედ ამიტომ, მიზანშეწონილად მიგვაჩნია მოხდეს საზოგადოებისთვის ზემოხსენებული ინფორმაციის უფრო დეტალურად მიწოდების უზრუნველყოფა.

შენიშვნები ანგარიშის დასკვნის ნაწილში:

დასკვნის ნაწილში არ უნდა იყოს საუბარი უკანონო ფარული მიყურადებებისა და თვალთვალის სისტემური დანაშაულის პრევენციის მიზნით, მხოლოდ სისხლის სამართლის კოდექსში შესატან ცვლილებებზე. აუცილებელია ამ საკითხის ყველა მარეგულირებელი კანონმდებლობის შეცვლა და შესაბამისი ინსტიტუციური მექანიზმების შემუშავება. აქვე, მიზანშეწონილია აღინიშნოს ბატონი თომას ჰამმარბერგის მოსაზრებები საკანონმდებლო ცვლილებების განხორციელების აუცილებლობაზე და ზედამხედველობის ინსტიტუციური მექანიზმების შექმნაზე, რომელზეც საუბარი იყო მის მიერ კომისიისთვის მომზადებულ სპეციალურ ანგარიშში. საკონსტიტუციო, სამართლებრივი რეფორმებისა და ადამიანის უფლებების საკითხებში ევროკავშირის სპეციალური მრჩეველი თომას ჰამმარბერგი აღნიშნავს, რომ პრობლემას წარმოადგენს და გადაჭრას საჭიროებს სამართალდამცავი ორგანოების მიერ საკომუნიკაციო ოპერატორებთან დამონტაჟებული მიყურადების მოწყობილობების არსებობის საკითხი, რომელიც საშუალებას აძლევს მათ ჰქონდეთ პირდაპირი წვდომა ყველა სახის კომუნიკაციებთან კერძო პირებს შორის.

პერსონალურ მონაცემებთან დაშვება შესაძლებელია მნიშვნელოვანი იყოს ორგანიზებულ დანაშაულთან ან ტერორიზმთან ბრძოლის წინააღმდეგ, თუმცა

ფარული მიყურადებისა და თვალთვალის უკანონოდ გამოყენების რისკის თავიდან ასაცილებლად აუცილებელია საკანონმდებლო, დემოკრატიული და სასამართლო კონტროლი ყველა სახის ქმედებებზე ამ სფეროში.

კომისიის წევრთა შენიშვნები რეკომენდაციების ნაწილში:

მნიშვნელოვანია რეკომენდაციების ნაწილში ვისაუბროთ სავარაუდოდ სისტემური დანაშაულის მომავალში პრევენციის კონკრეტულ მექანიზმებზე. ასევე გასათვალისწინებელია ბატონი თომას ჰამმარბერგის რეკომენდაციები, რომლებიც მან კომისიისთვის შეიმუშავა.

უახლოეს ვადებში უნდა შემუშავდეს და მიღებული იქნეს საკანონმდებლო ცვლილებები, რომელიც მაქსიმალურად გამორიცხავს პირადი ცხოვრების ხელყოფის შესაძლებლობას და ფარული საგამოძიებო მოქმედების განმახორციელებელი სუბიექტების მხრიდან ძალაუფლების ბოროტად გამოყენებას, კერძოდ:

საკანონმდებლო ცვლილებები

1. განისაზღვროს სამართალდარღვევის ხასიათი, რომელიც შეიძლება გახდეს ფარული თვალთვალისა და მიყურადების დაწყების საფუძველი; მიზანშეწონილია ფარული საგამოძიებო მოქმედებების გამოყენება ნებადართული იყოს თუ ჩადენილია ან მზადდება მძიმე ან განსაკუთრებით მძიმე დანაშაული.
2. განისაზღვროს პირთა კატეგორია, რომლებიც შეიძლება დაექვემდებარონ ფარულ მიყურადებას ან თვალთვალს. მოსმენაზე ნებართვის გაცემის საფუძველი შეიძლება გახდეს მხოლოდ გონივრულ ეჭვზე დაფუძნებული მყარი ვარაუდი, რომ ადამიანი მძიმე ან განსაკუთრებით მძიმე დანაშაულებრივ საქმიანობაში იყო ჩაბმული.
3. მნიშვნელოვანია, რომ დადგინდეს ფარული მიყურადებისა და თვალთვალის ხანგრძლივობის ლიმიტები, რათა არ მოხდეს მისი თვითნებური ან გადაჭარბებული ვადით გამოყენება. ასევე, ფარული მიყურადებისა და თვალთვალის შედეგად მოპოვებული ინფორმაციის შემოწმების, გამოყენების, შენახვის და ჩანაწერების წაშლისა და განადგურების წესები საჭიროებს საკანონმდებლო დონეზე დარეგულირებას.
4. ფარული საგამოძიებო მოქმედების განხორციელების, მის შედეგად მოპოვებული მასალის შინაარსისა და ამ მასალის განადგურების შესახებ წერილობით უნდა ეცნობოს პირს, რომლის მიმართაც განხორციელდა ფარული საგამოძიებო მოქმედება. ასევე, უნდა შემუშავდეს წესები, თუ რა ფორმით და რა ვადებში შეიძლება ეცნობოს პირს მის მიმართ განხორციელებული ფარულ მიყურადების ან თვალთვალის შესახებ ინფორმაცია და მისი გასაჩივრების წესი.

ზედამხედველობის მექანიზმების შექმნა

1. მიზანშეწონილია შეიქმნას სპეციალური საზედამხედველო საპარლამენტო კომისია, რომელიც ზედამხედველობას გაუწევს სამართალდამცავი ორგანოების მიერ ფარული მიყურადებისა და თვალთვალის შედეგად მოპოვებული ინფორმაციის შემოწმების, გამოყენების, შენახვის და ჩანაწერების წაშლისა და განადგურების წესების დაცვას;

2. ფარული მიყურადებისა და თვალთვალის ზედამხედველობის მექანიზმის შექმნის მიზნით ასევე აუცილებელია პირადი ინფორმაციის დაცვაზე პასუხისმგებელი სუბიექტების წრის გაფართოვება, გააქტიურება და მათთვის კანონმდებლობით დამატებითი ფუნქციების მინიჭება. ასევე, შესაძლებელია მოხდეს პერსონალური მონაცემების დაცვის ინსპექტორის უფლებამოსილებების გაზრდა.

ეკა გიგაური

„საერთაშორისო გაჭვირვალობა - საქართველოს“ აღმასრულებელი დირექტორი



ლაშა ტულუში

გაზეთ „რეზონანსის“ მთავარი რედაქტორი



კახაბერ კახიშვილი

საარჩევნო და პოლიტიკური ტექნოლოგიების კვლევის ცენტრის ხელმძღვანელი

